

Cu sosten di UNOCA, Gobierno di Aruba y TPEF

Museo Arqueologico ta preparando pa mantencion di su edificionan

E siman aki a cuminsa prepara pa locual mester bira e prome mantencion grandi na e compleho historico, ubicacion di Museo Arqueologico Nacional Aruba (MANA), den Schelpstraat. E luna aki ta cumpli 5 aña cu trabounan di restauracion y construccion na e antiguo mansion di famia Ecury a finalisa. E trabounan aki a encera un regalo di mas di 10 miyon florin di Fondo Europeo y un inversion di alrededor di 5 miyon florin di Gobierno di Aruba. E exposicion permanente a habri pa publico na final di juli 2009 danki na entre otro un inversion di 1 miyon florin di fondo di UNOCA.

Pa cuida e inversionnan aki, Museo a haci regularmente trabounan chikito di mantencion riba su edificio y e exposicion. Pa esaki a haci uzo di su propio presupuesto y di esun di Ministerio di Cultura. Mirando e necesidad pa un plan integral di mantencion, pa segura cu e Museo ta keda e 'landmark' den cual el'a converti su mes e ultimo añanan, a haya sosten di UNOCA pa traha esaki. Cu e plan aki MANA lo cuminsa ehecuta trabounan di mantencion pafo y paden di e edificionan. E plan lo indica na Museo tambe con pa mehora accesibilidad

den e areanan publico. Formulacion di e plan aki ta den man di e compania 'Arcotec' kende a inspecciona e daknan y otro facilidatnan di e compleho.

Pa ehecucion di e plan di mantencion, Ministerio di Cultura, Ministerio di Infraestructura y e 'Tourism Product Enhancement Fund' (TPEF) a pone medionan financiero disponibel riba presupuestonan di 2012 y 2013 di pais Aruba. Asina ta garantisca cu comunidad y bishitantenan internacional por sigui disfruta di e compleho monumental aki.

